

ՏՂԱ ԴԱՐՁՈՂ ԱՆՉԿԱ ՀԵՔԻԱԹԸ / Հայ ժողովրդական հեքիաթներ, Հատոր VIII / Գուգարք (Լոռի), Լոռու բարբառ (խոսվածք)

Ըլել ա, չի ըլել՝ մի քյասիբ մարդ, դա բեխա ունեցիլ չի, ինքը դարիբություն գնալու ա էլել, կնիկն էլ էրկու ֆոքիս ա ըլել:

Կնկանն ասել ա.— Թե տղա ըլի, էտ ա լավ, թե ախչիկ ըլի, կգամ քի էլ կսպանեմ, ախչկան էլ: Ասել ա ու գնացել էտ մարդը: Կնիկը խտոր ա ընկել, բերել ախչիկ: էտ Ախչիկը մենձացել ա, դառել տասերկու տարեկան, նոր հերը էկել ա: Մերը Ախչկանը պահել ա, որ հերն էկել ա: Մարդը հարցրել ա.— Ի՞նչ բերիր:

Ասել ա.— Տղա բերի, մեռավ:

Ասել ա.— Դե՛ լավ, պրծար:

Բիգունը մթանը Ախչիկը էկել ա, մորը դուս ա կանչել ու ասել, թե.— Ես գնալ կորչիլ պըտիմ, տու ծծերդ պաչեմ ու գնամ:

Մերը ծծերը հանում ա, Ախչիկը պաչում ա ու մի պտուկը կծում, պոկում, մի բանի մեջ փթաթում, դնում տղի շոր հագնում ու փախչում:

Շատ ա գնում, թե քիչ, աստոծ գիտի, գնում ա մի ջրի դրադ, տենում ա ըտի բեխեքը լեղանում են, մի պուճուր ըրեխա էլ ըտի նստած ա. բեխեքը բոթում են դրան, զցում ջուրը:

Էդ ախչիկը էդ բեխին ջրից հանում ա ու հարցնում ա.— Ո՞ւմ տղեն էս, որդիանցի էս:

Դա ջուղաբ տալիս չի, բեխեքն ասում են, թե.— Դա կորած բեխա ա:

Դա մեղքանում ա, ձեռիցը բռնում ու դրբա քաղաք տանում: Ճամփին մի պառավ մարդ նստած ա ըլում, գնում ա դրան բարով տալի, ասում.— Բարի՛ ըրիզուն, բիձա՛:

Ասում ա.— Աստ՛ւ բարին, բալա ջա՛ն, էդ ի՞նչ բեխա ա:

Ասում ա.— Գտել եմ, բեխեքը ջուրը զցեցին, էս ջրիցը հանեցի:

Բիձեն ասում ա.— Շատ լավ էս արել որդի, էդ թքավորի տղեն ա, կորել ա, էտ ա գտել էս, հմի տար տուր թքավորին, որ կասի՝ ի՞նչ էս ուզում, որ քի տամ, ասա՛՛ էն քու Սպիտակ ձին եմ ուզում: Կասե՛. «էն ի՞նչ ա, որ ուզում էս, փո՛ղ, ոսկի՛, դովլա՛ թ ուզե՛ տամ»:

Դու ասա, թե. «Չե՛, տալիս էս՝ ձին տու, տալիս չես՝ գլուխդ սաղ ըլի»: Եփ որ կտա, էլի իմ կուշտը արի:

Ախչիկը էտ տղին տանում ա տալի թքավորին: Թքավորը շատ ուրախանում ա, ասում ա.— Ուզե՛, որդի:

Ախչիկն ասում ա.— Թքավորն ապրած կենա, էս քու ջանի սաղութինն եմ ուզում:

Թքավորն ասում ա.— Էլի՛:

Ասում ա.— Որ ուզում էս մի բան տաս, քո Սպիտակ ձին տուր:

Ասում ա.— Սպիտակ ձին մի եռուն մանեթ անձախ աժենա, բա՛ն ուզե՛՛ բա՛ն տամ:

— Չե՛, — ասում ա, — էտ եմ ուզում:

Թքավորը Սպիտակ ձին տալիս ա նրան: Վեր ա ունում, գալիս էն բիձու կուշտը:

Բիձեն ասում ա.— Էդ ձին շատ հունար ունի, թքավորը գիտեր ոչ: Էս մեր հրևան թքավորը իրան ամարաթի կշտին մի մենձ խանդակ ա կտրիլ տվել, ով որ ձիով թռչի դրա վըրտվը, ախչիկը նրան պետք ա տա: Գնա՛. — ասում ա, — Էդ ձին կթռչի, թռի՛ր. թքավորը ախչիկը քի կտա: Ի՞նչ է որ ըտի ըլի, կգաս, ինձ կասես:

Ախչիկը ձին նի էլավ, գնաց տեհավ, որ խանդակը լիքը ձիու ու մարդու ջանդակ ա լցված. շատերն են էկել, կարացել չեն թռչի, ընկել են խանդակը:

Ախչիկը ձին ուզանգվեց, ձին թռավ, խանդակը անցավ:

Թքավորը կանչեց, ճակատը պաշեց ու ախշիկը տվուց: Օխտն օր, օխտը քշեր հրսանիք արին, կերան, խմեցին:

Վրա ութ օրը թքավորի ախշիկը տեհավ, որ էդ տղեն ախշիկ ա, լաց ըլելեն գնաց մորը ասավ.— Ձեր փեսան ախշիկ ա:

Թքավորն ասավ.— Ի՞նչ անեմ, ձեռովս սըպանեմ՝ ափսո՛ւ ա, դրկենք անմահական ջուրը բերելու, որ ընդի դները նրան փչացնեն:

Կանչեց փեսին, ասավ.— Կարա՞ս ու գնալ փըլան տեղիցը անմահական ջուր բերիլ:

Ասավ.— Խի՞ չեմ կարալ:

Ասավ.— Դե՛ գնա՛ :

Տղեն վերկացավ էկավ բիծու մոտ:

— Բիծա՛,— ասավ,— ինձ դրկում են անմահական ջրի:

Ասավ.— Հա՛, գիտեմ, դրկում են, որ գլուխդ տանեն. գնա՛, վախիլ մի: Ֆըլան տեղը մի ֆոր կա, մեջը անմահական ջուր կա, նրա պահապանին օխտը դն են, գնա՛ ձիուդ վեր էլած: Թուրդ հանե, կտորե, ինչքան դու թրով կըկտորես, էնքան ձին կըկտորե ոտով, համա մուղայիթ կաց, ձիուցը վեր չընկնես: Որ դներին կըկտորես, կմտնես ֆորը, ջուրը կհանես, համ դու կխմես, համ ձիուդ կխմացնես, մնացածը կածես տկի մեջ, կբերես:

Տղեն գնաց դներին կտորեց, մտավ ֆորի մեջը, ջուրը հանեց, համ ինքը խմեց, համ ձիուն խմացրեց: Մնացածը ածեց տկի մեջը, էդ դառավ էկավ, տվուց թքավորին:

Թքավորը տեհավ, որ բերել ա՝ ուրախացավ ոչ, հալա տխրեց էլ, ասավ.— Հըմի՞ ինչ անենք:

Ասին, որ Ջմրութ դուշը մերու միջին կենում ա, դրկեք, նրա թները շատ սիրուն ա, գնա բերե:

Որ գնաց՝ գալ չի, Ջմրութ դուշը նրան կվերջացնի:

Տղին կանչեց, ասավ թե.— Կարա՞ս ու գնաս Ջմրութ դուշի թները բերես:

Ասավ.— Խի՞ չեմ կարալ: Ասավ.— Դե՛ գնա:

Գնաց էլետ բիծու կուշտը:

Ասավ.— Բիծա՛, էս հետ դրկում են Ջմրութ դուշի թները բերելու:

Ասավ.— Գնա՛, ո՛րդի, վախիլ մի՛, գնա թքավորին ասա քի մի ուղտ տա, մեկ էլ մի գոմշի կաշի, կաշվումը կփթաթվիս, ձիու վրա կնստիս, ուղտն էլ հետդ կտանիս, մերու դրադին կկապես, դու ձին կքշես, կերթաս: Որ դուշը սպանես, փորը ճղի պ... կուլ տուր:

Տղեն գնա ց, շատ թե քիչ, աստոճ գիտե, գնաց հասավ մի մենձ մերի, ուղտը կապեց մի ծառից, ինքը ձիուն նստած նի մտավ մերին:

Դուշը վերնից էկավ, ասավ.— Ա՛յ իսանօղլի, օձն իրան պորտովը դուշն իրան թնովը իմ մերին չի գալի, դու քանի՛ գլխանի ես, որ իմ մերին ես մտել:

— Էկել եմ,— ասում ա,— քեզ սըտկացնեմ, թներդ տանիմ: Էս որ ասավ, դուշը չարացավ, վրա քշեց: Տղեն թուրը քաշեց, ինքը մեկ կողմեն, ձին մեկել կողմեն սկսեցին դշի հետ կովիլը:

Թրով զարկեց՝ վիզը կտրեց: Բերուց-թները կտրատեց, փորը ճղեց, պ... կուլ տվուց, թները բարձեց ուղտին, քշեց էկավ թքավորի կուշտը: Թքավորը ավելի տխրեց: Բիզունը գնաց իրա կնգա կուշտը, կնիկը վրեն ծիծաղեց:

— Հպարտանալ մի, որ անմահական ջուր բերիր, դշի թները բերիր, ինձ հըմա ավելի լավ կըլեր, որ մի խլնքոտ տղա ըլեիր, քանթե մի դոչաղ ախշիկ:

Տղան ասավ.— Բա տղա չեմ, ի՞նչ եմ:— Չունքի տեհել էր, որ դշի պ... կուլ տալու պես տղա էր դառել:

Աշխարհքը տվին էտ ախշկանը: Ռավոտը ուրախ-ուրախ վազեց մոր կուշտը, ասավ.— Աչքդ լի ա, տղա ա դառել ձեր փեսեն:

Նրանք հասան իրանց մուրազին, դուք էլ հասնուք ձեր մուրազին: Չարին ընդի, բարին ըտի:
Աստծանե իրեք խնձոր վեր էկավ. մինն՝ ասողին, մինը՝ լսողին, մինն էլ ավամ աշխարքին: